

सन् 2000 दे बाद दा डोगरी ललित निबंध साहित्य

डा.जोगिंदर सिंह

साहित्य च समें-समें पर नमीं विधाएं दी उत्पत्ति होंदी रौहूदी ऐ। एहू विधां समें दी धार पर चलदे होई अपने अस्तित्व गी प्रमाणत करदियां ना। हर इक विधा अपने आप च अथाह ज्ञान-भंडार संजोइयै रखदियां ना। जिस विधा पर रचनाकार दी द्रिष्टी गैहूराई तगर पुज्जदी ऐ जां ओहू रचनाकारें गी अपने पाससै आकर्शित करदी ऐ, उयै विधा सभनें थमां पैहूले अपने सरूप गी साहित्य च स्थापत करी लैदी ऐ।

निबंध इक ऐसी विधा ऐ जिस च पैहूली कलास दे निबंधें थमां लेइयै शोध-निबंध ते विचार प्रधान निबंध बी औंदे ना। ते इस बेल्लै जिसलै विधां टुट्टा करदियां न, इक दुए दा अतिक्रमण करदे होई इक-दुए च प्रवेश करा करदियां न उसलै डायरी, संस्मरण, रिपोर्ताज, शब्द-चित्र बी इससै दे अंतर्गत लैते जाई सकदे ना।

लेकिन जेहूडे निबंध गी निबंध दी कसौटी जां उत्कर्ष मन्नेआ जंदा ऐ, ओहू ऐ ललित जां व्यक्ति व्यंजक निबंध। एहू गद्य दी निहायत रम्य ते आत्मीय विधा ऐ। इंदे च लेखक दियें भावनाएं ते संवेदनाएं दा चित्रण प्रमुख तौरा पर होंदा ऐ। ललित निबंध थमां पैहूले बी साहित्य च उपन्यास, नाटक, कविता, संस्मरण, रेखाचित्र, लघुकथा, आत्मकथा बगैरा मतियां सारियां विधां लगातार अपना विकास करा करदियां ना। ललित निबंध बी इक ऐसी विधा दे रुप च साढे सामनै आई ऐ। ललित निबंध गी निबंध दा गै उपभाग मन्नेआ जंदा ऐ, पर एहू निबंध थमां बक्ख विधा दे तौर पर पंछान बनांदी जा करदी ऐ। इक नमीं विधा गी साहित्य ते साहित्यकारें च रचने बसने आस्तै केई बरें दा सफर तय करना पौंदा ऐ। ललित निबंध विधा ने बी साहित्य दे इन्नें उतार-चढ़ाएं गी पार करदे होई अपना थाहूर बनाया ऐ। निबंधकारें ललित-निबंध पाससै अपने-आप गी अग्रसर कीता। जिस कारण एहू विधा निरंतर रचनाकारें ते निबंधकारें दा आशीर्वाद पाइयै साहित्य दी उत्कृष्ट विधाएं च शामिल होई गेई ऐ।

होरनें आधुनिक भारतीय भाशाएं आहूला लेखा डोगरी भाशा दे रचनाकारें ते निबंधकारें बी इस विधा गी अपनाया ते खूबसूरत ललित निबंध लिखियै पाठकें तगर पजाया। भामें डोगरी च ललित निबंधें दी स्थिति अर्थात दशा उन्नी खरी नेई पर जिन्ने बी ललित निबंध लिखें गे न ओहू उच्चकोटि दे ना। डोगरी भाशा च ललित निबंधकारें दी गिनतरी घट्ट होने दा मुख कारण ऐ एहूदा सभनें थमां कठन विधा दा होना। कविता च ते अट्ट-दस् सतरां बी काफी होंदियां न, पर एहूदे च त्रै-चार सफे लिखने पौंदे न, ते उन्नी दूर तगर ललित भाव बनाई रक्खना बड़ा मुश्कल कम्म ऐ। भाशा दे व्याकरण, शब्द-कौशल ते वाक्य-विन्यास दा जिन्ना खरा ज्ञान होग, निबंध उन्ना गै शैल बनग। अर्थात एहू विधा कठन साधना दी मंग करदी ऐ, जेहूडी सभनें दे बस्सै दा रोग नेई ऐ।

ललित निबंधकारें दी गिनतरी घट्ट होने दा इक होर कारण एहू बी ऐ जे इस विधा दे लेखक गी बहुपाठी विद्वान ते मैहूनती होना चाहिदा। इक-दुए थमां अगें निकलने दी दौड़ दे समें च आमतौर पर

एहदी कमीं दिक्खी जंदी ऐ। पर फही बी डोगरी च ललित निबंध लिखे गे न ते दिन-ब-दिन इंदी गिनतरी च बाद्धा होआ करदा ऐ।

सन् 2001 च साहित्य अकादेमी, नमीं दिल्ली आसेआ डोगरी ललित निबंध नांऽ कन्नै निबंधें दी इक पुस्तक छापी गेई। इस कताब दा संकलन ते संपादन शिव दोबलिया होरें कीते दा ऐ। इस संकलन च छापे गेदे निबंध बीहमी सदी च लिखे गेदे ना। ते मते सारे शिराज़ा ते होर कताबें च बी छपी चुकें दे न, इसलेई में इंदे पर चर्चा नेई करा करदा।

साहित्य अकादेमी आसेआ डोगरी ललित निबंध नां कन्नै इक होर कताब सन् 2008 च छापी गेई। इसदा संकलन ते संपादन ज्ञान सिंह होरें कीते दा ऐ। इस संकलन च संकलित बी मते सारे निबंध ललित-निबंधें दी कोटि च औंदे ते किश बीहमी सदी च लखोए दे ते छपे दे ना। इस संकलन च छपे किश ललित निबंधें दे उदाहरण इस चाल्ली न-

प्रो. वेद कुमारी घई हुंदा लिखे दा निबंध जिसी अस ललित निबंध आखी सकनेआं “अऊं खड़ोता बिच्च बजारै” च बजारवाद बारै दस्सेआ गेदा ऐ। जिसलै कुसै चीजा दी जरूरत पौंदी ऐ तां बजारा खरिदियै आहनना पौंदी ऐ। पर पराने जमाने च हर चीज लैन बजार नेई हा जाना पौंदा। मती सारियां चीजां आंढियें-गुआंढियें थमां मिली जंदियां हियां। समाज च आपसी हमदर्दी ही। पर अज्ज जमाना बदली गेदा ऐ। निबंध चा इक उदाहरण-

“हून ते जमाना गै बदलोई गेदा ऐ। केहू करना ? छुट्ट नाजै दे ग्रांऽ दे घरें च बरतोने आहली हर चीज बजारा आहननी पौंदी ऐ। लाने लेई टल्ले, बछाने लेई दरियां, खेस, गद्दे, चादरां, सौने-बौहने लेई खट्टां, आसन, चौकियां, सोफे सब किज नगगर जां नगरोंटे दे बजारा मंगाना पौंदा ऐ”।

जितेन ठाकूर होरें अपने निबंध मन च अपने अनुभवें गी अधार बनाइयै मना दी व्याख्या कीती दी ऐ। ओहू आखदे न- “मन बड़ी गै कुंगली चीज ऐ। कदें नजरें ने गै बंधोई जाग ते कदें बोल्लें ने गे मरडोई जाग। ब कोई इसी तीरें तलवारें ने बी नेई मारी सकदा। लोहे दी दवारें कन्नै नेई रोकी सकदा। कुसै दी ममूली नेही तरीफ करियै बी तुस ओहूदे मनै ई खरीदी लैगे ब बड़ा मुल्ल चकाइयै बी कुसै दी हमदर्दी नेई पाई सकदे”।

इससै चाल्ली शिवदेव सिंह सुशील हुंदा निबंध ‘समाज सेवक’, ओम विद्यार्थी हुंदा ‘कुदरत दे कन्नै-कन्नै’, कुवर वियोगी हुंदा ‘संदोख सिद्धी’ प्रो. चम्पा शर्मा हुंदा ‘इक्कलपुना’, मदन गोपाल पाध्या हुंदा ‘मना आहली खौदल’ बगैरा खूबसूरत ललित निबंध ना।

डोगरी भाशा च ललित निबंधें दियां दो अनमोल कृतियां, जिंनें स्हेई मैहने च इस विधा कन्नै पंछान करोआई। पैहली प्रो. ललित मगोत्रा हुंदी ‘चेते दियां गलियां’, ते दुई नरेंद्र भसीन हुंदी ‘सुझी सम्हाल’।

ललित निबंधें दे त्रै प्रमुख बिंदू मन्ने जाई सकदे ना। पैहला ते एहू ऐ जे इसदी शुरुआत किस्से-कहानी आहला लेखा हल्के-फुल्के ढंग कन्नै होंदी ऐ। बशकार च रचना गंभीर रुप धारण करी लैंदी ऐ, जित्थै गंभीर समस्यां पैदा होंदियां न ते बिच्च-बिच्च मनोरंजक प्रसंग बी औंदे ना। एहूदे बाद त्रिए स्तर पर लेखक चानक पाठकें गी कुसै विचार जां चिंतन दे महासमूंदर च पुजाई दिंदा ऐ। प्रो. ललित मगोत्रा ते नरेंद्र भसीन हुंदे ललित निबंधें च एहू सब्भै विशेशतां मजूद ना।

प्रो. ललित मगोत्रा हुंदा निबंध संग्रह 'चेते दियां गलियां' सन 2009 च प्रकाशित होआ ते इसदे च कुल 65 ललित निबंध ना। 'चेते दियां गलियां' पुस्तक बारै त्र'ऊं लेखक-विद्वानें आसेआ प्रगट कीते गेदे विचारें दा वर्णन करना चांहूग। सभनें थमां पैहूले प्रो. वीणा गुप्ता होर- "इस कृति दी हर इक रचना च उसदे पद्योक्त ते प्रसंग-संदर्भ ने ते जो मुतासर कीता सो कीता पर उंदे पर सरल, सुंदर ते बे-बनौटी भाशा च लेखक दी प्रतिक्रिया, टिप्पणी ते विचारधारा दे सरूप दिते गेदे तर्क ते विचार ने जिंदगी दी खूबसूरती तपाशने-मसूसने ते दिखवने दा जो सुखद एहसास दोआया, उयै इस कृति दा हासल ऐ।, जिसी शब्दें च विस्तार च बघना मेरे आस्तै मुश्कल ऐ"।

डा. अरविंद हुंदे शब्दें च- "चेते दियां गलियां, इक ऐसा मैखाना ऐ, जित्थै आइयै में बसोएआं, मेरा थकेमां घटेआ ऐ ते मिगी अगै दी गैंड पुट्टने दा उद्धम थहोआ ऐ। इनें गलियें च तुस बी खुल्ले मनै कन्नै फेरा पाएओ, होई सकदा ऐ जे तुस बी मेरे आंडर मसूस करो"।

प्रो. शशि पठानिया हुंदे शब्दें च- "इनें निबंधें च जित्थै विचारें दे किश नमें रंग, नमें आयाम लभदे न उत्थै चेतें दा कारवां नां बिंद बिरल दिंदा ऐ ते नां गै थम्होंदा ऐ। इनें निबंधें च विशें दी बड़ी विविधता ऐ। हर इक निबंध अपने आपै च इक नमां विचार जां भाव समेटे दा ऐ"।

'चेते दियां गलियां' दे निबंधें च लेखक दे निजी जीवन च घटी दी परतक्ख घटनाएं उंदे प्रसंगें, निजी सम्पर्क च आई दियें शख्सीयतें, लेखक आसेआ परतक्ख दिक्खे दे थाहूरें, उंदी खूबसूरती अर्थात् उंदे निजी जीवन दे अनुभव न, जिनेंगी लेखक ने तर्क-विचार दी सादी, सरल ते सैहज भाशा च व्यक्त कीते दा ऐ।

प्रो. ललित मगोत्रा होरें जम्मू शैहरा दी परानी जीवन-शैली, उस बेल्ले दी रैहत-बैहत, अध्यापकें दी विद्यार्थियों प्रति हमदर्दी ते लगाऽ उंदे कन्नै नेडमा सरबंध विद्यार्थियों दे उज्जल भविक्ख दी भावना 'अनोखी ट्यूशन' निबंध राहें प्रगट कीती दी ऐ। इक उदाहरण- "जेल्लै म्हीना भर एह ट्यूशन पढियै में मास्टर जी गी पुच्छेआ जे ट्यूशना दे किन्ने पैसे देने न तां ओह हस्सियै आखन लगे, तू केहू सोचा करदा हा जे में तूई पैसे लेई ट्यूशन पढाऽ करना। मुर्खा, में ते इसलेई तुगी पढाऽ करनां जे तेरे मते नंबर औन, जिन्ने नंबर लैने दी तेरे च पोर्टैशल ऐ"।

इस्सै चाल्ली पराने जम्मू शैहरा दी साफ-सुथरियें ते शांत गलियें दा वर्णन 'अबादी दी भीड़' ते 'जम्मू दियां गलियां' च कीते दा ऐ। 'परौहूनचारी' निबंध च घर आए दे परौहूने दे आदर-मान दी रवायत दा, 'रिश्तखोरी दी महामारी' च समाज च व्याप्त रिश्तखोरी ते भ्रष्टाचार दी समस्या दा, 'चेतें दी बरसांत' च बरसांती दे मौसम च भात-सभांते खान-पीन ते मौज मनाने दे ढंग-तरीकें दा ते सोहे दे चेतें च शिकल दपैहरी गुड्डियां चढाने दे चेतें जां फही गलियें च खट्टे कचालू, खोए-मलाई दियें बर्फें ते गट्टे दे चिड़ियां-मोर बेचने आहूले दे सुरें दा वर्णन ऐ।

'अधरंगा समाज', 'अमर अवाज' ते 'कुड़ियां दे देवियां' निबंधें च समाज च नारी दी स्थिति दा वर्णन कीते दा ऐ। अधरंगा समाज चा इक उदाहरण-

"अपनी अद्धी अबादी (जनाना अबादी) गी जेकर अस नां आजादी कन्नै जीन देगे नां गै कोई चंगा कारोबार अपनाइयै कम्म करन देगे, तां फही इस अधरंगे समाज कन्नै अस किन्ना क चली सकगे ?"

‘साहब दा पुत्तर साहब ते चपड़ासी दा पुत्तर चपड़ासी’, ‘कीमती सोआल’, ‘कोहदी सरकार?’ ‘बैहमी जनता’, ‘सरकारी नौकर जां सरकारी मालक’ बगैरा निबंधें राहें लेखक ने समाज च व्याप्त भ्रष्टाचार, रिश्वतखोरी, जंगलराज जनेही निजामी कमजोरियों ते समाजी असंगतियों पर करारी चोट कीती दी ऐ- ‘कोहदी सरकार?’ निबंध चा इक उदाहरण-

“ट्रैफिक पलीस आहूले समझदे न जे उं’दा असली कम्म छड़ा बी.आई.पी लोके दियें गड़ियें गी सिडके उपपर बगैर रुकावट दे चलन देना ऐ। ते इसदे कोला बी मता जरूरी कम्म ऐ- बस्सें, ट्रैके, मैटाडोरे ते बाहरली रियास्ते चा आई दी गड़ियें कोला पैसे ग्राहने। आम लोके दी ट्रैफिक भामें खुहै च पवै”।

‘अनुशासन ते लखारी’, ‘काले शीशे’, ‘गलत शिक्षा’, ‘परमात्मा पर भरोसा’, ‘पैदल सफर’, ‘साहित्यकार दी जात’, ‘फैशन दे बदलोदे रंग’, ‘कताबें दा शौक’, ‘कताबां ते पढ़ाई’, ‘डर-दोस्त जां दुश्मन’, ‘ब्याह ते तलाक’, ‘बचैरा- जिसदे कोल कोई चारा नेई’, ‘भरम ते आस्था’, ‘मार ते सुधार’, ‘जिंदगी दे पेचे’, ‘धनवंतरी- डुंगर दा महान सपूत’ बगैरा निबंधे च किश नेहू संदर्भ, घटनां ते विचार संजोए गेद न जेहूडे गैर सधारण व्यक्तित्व आहूलियें सधारण शख्सीयतें कन्नै पाठके गी रू-ब-रू बी करांदे न ते तर्क-दलीलें ते सुंदर विचारें गी जन्म देइयै उं’दे अंदर सकारात्मक ते रचनात्मक सोच बी पैदा करदे ना।

‘जिंदगी दे पेचे’ निबंध च लेखक ने जिंदगी दी बक्ख-बक्ख स्थितियों ते समस्याएं कन्नै निब्वडने आस्तै गड़ियें-गुड़े दे चढ़ने दी अदायगी च औने आहूले तुआर चढ़ाऽ ते घेरे-पेचें दियें स्थितियों कन्नै मेलदे होई अपने अनुभवें राहें बड़ी खूबसूरती कन्नै समझाए दा ऐ।

दरअसल इस संग्रह दे सारे निबंध प्रो. मगोत्रा हुंदे व्यक्तिगत अनुभवें पर आधारत न, जेहूदे च उं’ने अपने समूलचे जीवन गी सरल, सादी ते प्रभावपूर्ण भाशा च प्रगट कीते दा ऐ। प्रो. मगोत्रा होरें भाशा दे शाब्दिक सौंदर्य गी इक बक्ख पंछान दिती दी ऐ ते वाक्यांशें गी किश इस चाल्ली प्रस्तुत कीते दा ऐ जे इनें पढ़दे होई अक्खें सामनै दिश उभरण लगी पौंदे ना। इयै रचनाकार दी सभनें थमां बड़ी ताकत होंदी ऐ।

नरेंद्र भसीन हुंदा ‘सुझी सम्हाल’ नां दा लघु निबंध-संग्रह 2013 च प्रकाशत होआ। ‘चेतें दियां गलिया’ आहूला लेखा एहूदे च बी पराने जम्मू शैहर दे जन-जीवन, मान्यताएं, रहून-सैहून ते परम्पराएं ते अज्ज दे समें दियें समस्याएं दा खूबसूरत वर्णन ऐ। अर्थात डुंगर दे अतीत ते वर्तमान समाजी परिवेश दा चित्रण कीता गेदा ऐ। में इस संग्रह बारै प्रो. वीणा गुप्ता हुंदे विचार सांझा करड - “इनें निबंधें गी पढ़ियै जित्थै इक पाससै लेखक दी चेतें दी बारादरी च उसदे जीवन दे अनबिस्सरने प्रसंगें दी भरमार पाठक दी रुचि ते उत्सुकता बधाने च कारगार सिद्ध होंदी ऐ उत्थै होए-बीते ते मौजूदा समें दे समाज दियां नरोइयां झलकां डुंगर दे अतीत ते वर्तमान समाजी परिवेश दा चित्रण करदे होई समें दे कन्नै समाजी बदलाव दा तुलनात्मक परिदृश बंदेरदियां जंदियां ना। एहू संग्रह लेखक दी चिंतन मधानी दे रिडकने गी वाणी दिंदा सैहूज ते स्वच्छंद अभिव्यक्ति दी सुंदर पेशकश ऐ।”

इस संग्रह दे किश इक निबंध रेखाचित्रें दी विशेषता प्रकट करदे ना। जियां- ‘हून सादे कुल देने’ च मुखराज नाई दी ईन-इज्जत ते कम्म करने दी चतराई दे गुण, ‘मां ब्रह्माचारणी’ च गंगा देई नां दी इक आम डोगरी महिला दा रेखाचित्र ऐ, “एस. के. बजाज - इक सच्चे गांधीवादी” च बजाज हुंदे गांधीवादी विचारें ते सेवाएं दा चित्रण ऐ। इ’नें शख्सीयतें बारै लेखक ने इसकरी लिखेआ की जे नमीं

पीढ़ी इनें खास शख्सीयतें दे जीवन ते उंदे आसेआ जन-कल्याण आस्तै कीती गेदी सेवा बारै जानी सकना। मां ब्रह्माचारनी निबंध चा इक उदाहरण- "शायद कुसै थाहर जेकर गंगा देई ने एहू भगीरथ सेवा अभियान चलाए दा होंदा तां ओहूदा नां नाइटिंग-गेल ते मदर टेरेसा जनेहियें महान हस्तियें च शुमार होंदा, पर अस डोगरे मनै च भामें किन्ना बी हिरख ते मान की नेई रखदे होचै पर उसी लिखत रुपा च बुहासरने च किश संकोच करने आं।"

इस्सै चाल्ली 'मुंझू थमां मस्तान' हमदर्दी ते मनुक्खी संवेदना दा स्नेहा देने आहूला निबंध ऐ। 'कुलमार सप्प' च सप्पें दी जातियें ते सपेरें बारै ज्ञान देने आहूला ऐ। 'रले-मिलेआ साग' निबंध राहें लेखक ने साग बेचने आहूली थमां रली-मिलियै रौहने दा संदेश दोआए दा ऐ, जेहूड़ी इस समें दी सभने थमां बड्डी जरूरत ऐ। 'मजमा', 'मौती दा डर सांझा', 'सफर ते साथी' निबंध कला दे सरोखड़ उदाहरण ना।

दरअसल नरेंद्र भसीन होरें समाज च आई दियें नेकां तब्दिलियें पर चिंता करियै ललित निबंधे दे रुप च पेश करियै समाजी चेतना जगाने दी कोशश कीती दी ऐ।

'चेते दियां गलियां' ते 'सुझी सम्हाल' ललित निबंध संग्रह च इक पाससै सांस्कृतिक परम्परा दा बोलबाला ऐ ते दुए पाससै नमें जीवन दियें समस्याएं दा वर्णन ऐ। इंदे च लोक, संस्कृति, डोगरियत, राश्ट्रीयता, प्रकृति, धर्म-अध्यात्मक ते चिंतन समाए दा ऐ।

निश्कर्श दे तौर पर अस आक्खी सकने आं जे डोगरी दे एहू ललित निबंध होरनें आधुनिक भारती भाशाएं दे मकाबले च कुसा गल्ला बी घट्ट नेई हैन।